

ԾԱՅՐԱԳՈՅՆ ՊԱՏՐԻԱՐԷ  
ԿԱԹՈՂԻԿՈՍ  
ԱՄԵՆԱՅՆ ՀԱՅՈՑ  
ՄԱՅՐ ԱԹՈՒՍՈՒՐԷ ԷՋՄԻԱԾԻՆ



SUPREME PATRIARCH  
CATHOLICOS  
OF ALL ARMENIANS  
MOTHER SEE OF HOLY ETCHMIADZIN

ԳԻՐ ՀԱՅՐԱՊԵՏԱԿԱՆ ՕՐՀՆՈՒԹԵԱՆ ԵՒ ԳԼԱՅԱՏԱՆԱՑ  
ՍԻՐԵՑԵԱԼ ՈՐԴԻՈՑ ՄԵՐՈՑ ԵՒ ՀԱՐԱԶԱՏ ԶԱԲԱԿԱՑ  
ՄԱՅՐ ԱԹՈՒՈՑ ՍՐԲՈՑ ԷՋՄԻԱԾՆԻ  
ԱՆԴԱՄՈՑՆ ԹԵՄԱԿԱՆ ՊԱՏԳԱՄԱԽՈՐԱԿԱՆ ԺՈՂՈՎՈՅՆ  
ԿԱՆԱԴԱՅԻ ՀԱՅՈՑ ԹԵՄԻ, ՈՐ Ի ՎԱՆՔՈՒՎԸՐ, ԿԱՆԱԴԱ

Կանադայի Հայոց Թեմի տարեկան Պատգամաւորական ժողովի առիթով ջերմ ողջոյնով Հայրապետական Մեր օրհնութիւնն ենք յղում ժողովի բոլոր մասնակիցներին, որ գլխաւորութեամբ Թեմակալ առաջնորդ Գերաշնորհ Տ. Աբգար Եպիսկոպոս Հովակիմեանի, միաւորուել էք կանադահայութեան կեանքին առնչուող խնդիրները քննութեան առնելու և թեմի գործունէութիւնը առաւել արդիւնաւոր դարձնելու նպատակով:

Աշխարհի տարբեր ծայրերում բնակութիւն հաստատած հայորդիները մեր Եկեղեցու հովուական խնամատարութեամբ անխախտ են պահպանել իրենց ազգային ու հոգևոր ինքնութիւնը, շարունակաբար հաղորդուել մեր հայրերի նուիրական ժառանգութեանը: Գրեթէ բոլոր հայաշատ բնակավայրերում կառուցուել են Եկեղեցիներ, որոնց շուրջ Մեր զաւակները միաւորուել ու դարձել են հաւատի մեծ ընտանիք, որի ամուր ու անխախտ հիմքը սերն է առ Բարձրեալն Աստուած, առ ազգն ու հայրենիքը հայոց:

Գոհունակութիւն է Հայրապետիս համար հաստատել, որ կանադահայութեան կեանքը ևս կառուցուած է մեր Սուրբ Եկեղեցու շուրջ, որի տիրաւանդ առաքելութիւնը դուք, սիրելիներ, ջանում էք առաւելագոյնս արդիւնաւորել, որպէսզի մեր Եկեղեցին շարունակի խնամել և հոգատարել իր զաւակներին, նրանց կեանքը լցնել Աստուծոյ խօսքով, Աստուծոյ օրհնութեամբ ու շնորհներով: Կանադահայ համայնքի ձեռքբերումներն ու յաջողութիւնները, որ ուրախացնում են մեզ, արդիւնքն են թեմի հոգևոր դասի հաւատարիմ սպասաւորութեան և ազգանուէր հայորդիներիդ ազնիւ յանձնառութիւնների: Թեմական ու ծխական խորհուրդների, տիկնանց ու երիտասարդաց միութիւնների ու թեմական այլ կառոյցների կազմերում նախանձախնդիր գործունէութեամբ Դուք Աստուծոյ անունն էք փառաւորում և գովարժան ջանքեր բերում, որ մեր ժողովրդի զաւակները առաւել կապուեն մեր Եկեղեցուն, ներգրաւուեն համայնքային կեանքի մէջ, կրողը լինեն մեր ազգային իղծերի ու տեսիլքների: Մենք բարձօրէն գնահատում ենք Ձեր վաստակը մեր Եկեղեցու կեանքում, գնահատում ենք Ձեր սերն ու նուիրումը՝ հանդէպ մեր ժողովուրդը:

Առ Աստուած աղօթքով Բարձրեալի օրհնութիւնն ու զօրակցութիւնն ենք հայցում ձեզ և յաջողութիւններ մաղթում Պատգամաւորական ժողովի աշխատանքներին: Մեր յորդորն է, որ ձեր միասնական աշխատանքով առաւել

շենացնէք Կանադայի Հայոց Թեմը՝ ի բարօրութիւն կանադահայ աստուածասէր Մեր  
զաւակների: Շարունակէք նաև ձեր բարի աւանդը բերել ազգային մեր իղծերի  
իրականացմանը, մեր Հայրենիքի՝ Հայաստանի և Արցախի զօրացմանը և  
աստուածպարգև մեր երկրում խաղաղ և օրհնեալ կեանքի կառուցմանը:

Թող Տէրը հանապազ օրհնութեամբ անսասան պահի Կանադայի Հայոց Թեմը և  
Առաքելական մեր Սուրբ Եկեղեցին:

*Ողջ լեռուք ի Տէր, զօրացեալ շնորհօք Սուրբ Հոգւոյն և յաւետ օրհնեալ ի Մէնջ.  
ամէն:*

Օրհնութեամբ՝



ԳԱՐԵԳԻՆ Բ  
ԿԱԹՈՂԻԿՈՍ ԱՄԵՆԱՅՆ ՀԱՅՈՑ